



ԵՐԵՎԱՆԻ ՊԵՏԱԿԱՆ ՀԱՄԱԼՍԱՐԱՆ

Հ Ր Ա Մ Ա Ն

№ 159 Թ 38 « 29 » 08 201 4թ

ԵՐԵՎԱՆԻ ՊԵՏԱԿԱՆ ՀԱՄԱԼՍԱՐԱՆԻ ՍՈՎՈՐՈՂՆԵՐԻՆ ՈՒՍՄԱՆ ՎԱՐՁԱՎՃԱՐԻ ՄԱՍՆԱԿԻ ՓՈԽՅԱՏՈՒՑՈՒՄ ՏՐԱՄԱԴՐԵԼՈՒ ԿԱՐԳԸ ԵՎ 2014-2015 ՈՒՍՈՒՄՆԱԿԱՆ ՏԱՐՎԱ 1-ԻՆ ՈՒՍՈՒՄՆԱԿԱՆ ԿԻՍԱՄՅԱԿԻ ՀԱՄԱՐ ՄԻՋԻՆ ՈՐԱԿԱԿԱՆ ԳՆԱՀԱՏԱԿԱՆԻ (ՄՈԳ) ՇԵՄԸ ՍԱՀՄԱՆԵԼՈՒ ՄԱՍԻՆ

2014թ. հունիսի 9-ին ընդունված ««Բարձրագույն և հետբուհական մասնագիտական կրթության մասին» ՀՀ օրենքում փոփոխություններ և լրացումներ կատարելու մասին» ՀՀ օրենքի (ՀՕ-23-Ն) կիրարկումն ապահովելու նպատակով, մինչև Երևանի պետական համալսարանի ուսանողական նպաստների և պետական կրթաթոշակների հատկացման նոր կանոնակարգի ընդունումը Երևանի պետական համալսարանի սովորողներին ուսման վարձավճարի մասնակի փոխհատուցում տրամադրելու գործընթացը կանոնակարգելու համար

հրամայում եմ.

Սահմանել, որ.

1. Երևանի պետական համալսարանը, վճարովի համակարգում սովորող ուսանողական համակազմի առնվազն տաս տոկոսին, ուսանողների վարձավճարներից գոյացած բյուջեի առնվազն յոթ տոկոսի չափով, իր միջոցների հաշվին՝ հիմք ընդունելով բարձր առաջադիմությունը և սոցիալական խումբը, իրականացնում է ուսանողական նպաստի ձևով ուսման վարձավճարի մասնակի փոխհատուցում հետևյալ կարգավիճակ ունեցող ուսանողներին.

1.1. սոցիալապես անապահով (ընտանիքների ապահովության սահմանային միավորից բարձր միավոր ունեցող ընտանիքների) ուսանողներին,

1.2. 18 տարին լրանալուց հետո առանց ծնողական խնամքի մնացած ուսանողներին մինչև 23 տարին լրանալը,

1.3. 23 տարին չլրացած միակողմանի ծնողազուրկ (միածնող) ուսանողներին,

1.4. մինչև մեկ տարեկան երեխա ունեցող ուսանողներին,

1.5. երեք և ավելի անչափահաս, կամ երեք և ավելի ուսանող երեխա ունեցող ընտանիքների ուսանողներին,

1.6. 1-ին կամ 2-րդ խմբի հաշմանդամ, այդ թվում՝ հաշմանդամ ազատամարտիկ ծնող ունեցող ուսանողներին,

1.7. մարտական հերթապահություն իրականացնող զորամասերում մարտական հերթապահության մեջ ընդգրկված պարտադիր ժամկետային զինվորական ծառայություն անցած ուսանողներին (համապատասխան տեղեկանքի ներկայացման դեպքում),

1.8. սոցիալապես անապահով (ընտանիքների ապահովության գնահատման համակարգում հաշվառված, անապահովության 0 միավորից բարձր միավոր ունեցող ընտանիքների) ուսանողներին,

1.9. ուսանողական նպաստների համակարգում չընդգրկված, երկու կիսամյակ անընդմեջ առավել բարձր առաջադիմություն (ՄՈԳ-ը բարձր է 18.00-ից) ցուցաբերած ուսանողներին, որոնք ուսանողական նպաստի ձևով ուսման վարձավճարի լրիվ փոխհատուցման համար անցկացված փոխատեղման մրցույթի արդյունքում զրկվել են նպաստի իրավունքից մինչև 0.1 միավոր տարբերության պատճառով,

1.10. մարտական գործողությունների մասնակիցների (ազատամարտիկների) երեխա ուսանողներին (համապատասխան փաստաթղթերի ներկայացման դեպքում),

1.11. հեռավոր լեռնային և սահմանամերձ գյուղերի հանրակրթական դպրոցների ուսուցիչների (երկու ծնողները) երեխա ուսանողներին,

1.12. Երևանի պետական համալսարանում հիմնական աշխատանքային պայմանագրով աշխատող-ուսանողներին և նրանց երեխա-ուսանողներին.

1.13. առանձնահատուկ դեպքերում, ԵՊՀ ռեկտորի որոշմամբ այլ կարգավիճակ ունեցող ուսանողներին:

2. Սույն հրամանի 1-ին կետով սահմանված կարգավիճակ ունեցող ուսանողներին տրամադրվող ուսանողական նպաստի ձևով ուսման վարձավճարի մասնակի փոխհատուցման չափը սահմանվում է.

2.1. Սույն հրամանի 1.8. և 1.10. ենթակետերում նշված ուսանողների համար՝ 20 տոկոսի չափով:

2.2. Սույն հրամանի 1.2., 1.3., 1.4. և 1.9. ենթակետերում նշված ուսանողների համար՝ 50 տոկոսի չափով:

2.3. Սույն հրամանի 1.1., 1.5., 1.6. 1.7. և 1.11 ենթակետերում նշված ուսանողների համար՝ 30 տոկոսի չափով:

2.4. Սույն հրամանի 1.12. ենթակետում նշված դեպքերում՝

ա) Երևանի պետական համալսարանում 5-15 տարվա աշխատանքային ստաժ ունենալու դեպքում՝ պրոֆեսորադասախոսական համակազմի աշխատողների համար 60 տոկոսի չափով (մագիստրատուրայում՝ 40 տոկոսի չափով), մյուս տարակարգերի աշխատողների համար՝ 50 տոկոսի չափով (մագիստրատուրայում՝ 30 տոկոսի չափով).

բ) Երևանի պետական համալսարանում 15 տարուց ավելի մինչև 25 տարվա աշխատանքային ստաժ ունենալու դեպքում՝ պրոֆեսորադասախոսական համակազմի աշխատողների համար՝ 70 տոկոսի չափով (մագիստրատուրայում՝ 50 տոկոսի չափով), մյուս տարակարգերի աշխատողների համար՝ 60 տոկոսի չափով (մագիստրատուրայում՝ 40 տոկոսի չափով).

գ) Երևանի պետական համալսարանում 25-ից ավելի տարիների աշխատանքային ստաժ ունենալու դեպքում՝ պրոֆեսորադասախոսական համակազմի աշխատողների համար՝ 80 տոկոսի չափով (մագիստրատուրայում՝ 60 տոկոսի չափով), մյուս տարակարգերի աշխատողների համար՝ 70 տոկոսի չափով (մագիստրատուրայում՝ 50 տոկոսի չափով):

Երևանի պետական համալսարանում վարչական և գիտական պաշտոն զբաղեցնող աշխատողները, եթե տվյալ ուսումնական տարում դասավանդում են 0,5 և ավելի դրույքաչափով, օգտվում են սույն կետով պրոֆեսորադասախոսական համակազմի համար սահմանված արտոնություններից:

2.5. Սույն հրամանի 1.13. ենթակետում նշված դեպքերում՝ ԵՊՀ ռեկտորի որոշմամբ:

2.6. Սույն հրամանով սահմանված կարգավիճակ ունեցող, առավել բարձր առաջադիմություն (ՄՈԳ-ը բակալավրիատում բարձր է 18.00-ից, մագիստրատուրայում՝ 19.00-ից) ցուցաբերած ուսանողների սույն կետով սահմանված ուսման վարձավճարի մասնակի փոխհատուցման չափն ավելացվում է 10 տոկոսով:

3. Երկու և ավելի կարգավիճակների համապատասխանող, կամ մի քանի արտոնություններին հավակնելու դեպքում ուսանողը կարող է օգտվել դրանցից միայն մեկից, որի դեպքում կիրառվում է մասնակի փոխհատուցման առավելագույն չափը:

4. Ուսանողական նպաստի ձևով ուսման վարձավճարի մասնակի փոխհատուցումից ուսանողը կարող է օգտվել սահմանված միջին որակական գնահատականի (ՄՈԳ) շեմը հաղթահարելու դեպքում: Անհարգելի պատճառներով (անբավարար գնահատական (չստուգված) ստանալու կամ անհարգելի պատճառով քննությանը (ստուգարքին) չներկայանալու դեպքերում) ակադեմիական պարտքերի մարման շրջանում քննություններ (ստուգարքներ) հանձնած ուսանողները ուսման վարձավճարի մասնակի փոխհատուցման իրավունքից չեն օգտվում:

Յուրաքանչյուր ուսումնական կիսամյակի համար միջին որակական գնահատականի (ՄՈԳ) շեմը սահմանվում է ԵՊՀ ռեկտորի հրամանով:

5. Բակալավրիատի և մագիստրատուրայի առկա ու հեռակա ուսումնառության համակարգերում սովորող առաջին կուրսի ուսանողները, ուսման վարձավճարի մասնակի փոխհատուցման իրավունքից կարող են օգտվել միայն ուսումնառության երկրորդ կիսամյակից, բացառությամբ սույն հրամանի 1.12-րդ կետով սահմանված կարգավիճակ

ունեցող ուսանողների, ովքեր ուսման վարձավճարի մասնակի փոխհատուցման իրավունքից կարող են օգտվել ուսումնառության առաջին կիսամյակից:


Սույն կանոնակարգի 1.9. կետում սահմանված կարգով ուսման վարձավճարի մասնակի փոխհատուցման իրավունքից կարող են օգտվել միայն առկա ուսուցման համակարգում սովորող ուսանողները՝ սկսած երկրորդ կուրսից:

6. Երևանի պետական համալսարանում 2014-2015 ուսումնական տարվա 1-ին ուսումնական կիսամյակի համար միջին որակական գնահատականի (ՄՈԳ) շեմը սահմանել. բակալավրիատում՝ 9.00, մագիստրատուրայում՝ 14.00:

7. Սույն հրամանի մասին սահմանված կարգով տեղեկացնել ԵՊՀ ուսանողներին և աշխատողներին:

8. Սույն հրամանն ուժի մեջ է մտնում 2014թ. սեպտեմբերի 1-ից

ԵՊՀ ՌԵԿՏՈՐ



Ա. Ռ. ՄԻՄՈՆԻԱՆ